

*Pagtulon-an 20 — Si Pedro Maoy Pangulo*

*Diha Sa Dalan Sa Gingharian*

*(Mga Buhat 1-7)*

**KATUYOAN:** Pagtudlo sa mga magtotoo sa ilang katungdanan sa pagpamatuod kang Cristo.

Mahanduraw nato ang kalipay sa mga apostoles human nadawat nila ang balita nga si Jesus buhi. Si Jesus nagpakita nga buhi ngadto sa kapin sa lima ka gatus ka mga tawo gawas sa Iyang mga apostoles ug nakigsulti kanila mahitungod sa Gingharian sa Langit, 1 Corinto 15:5,6. Human matigum ang mga apostoles, nangutana sila Kaniya sa pagingon, "Ginoo, niini bang panahona karon iga-pahuli mo ang gingharian ngadto sa Israel?" Ug Siya mitubag kanila, "Dili itugot kaninyo ang pagkasayud sa mga panahon o mga kahigayonan nga gitudlo sa Amahan pinaagi sa Iyang kaugalingong kagahum. Apan kamo magadawat hinoon ug gahum sa diha nga kakunsaran na kamo sa Espiritu Santo; ug kamo mao unya ang akong mga saksi sa Jerusalem ug sa tibuok Judea ug Samaria ug hangtud sa kinatumyan sa yuta," Mga Buhat 1:6-8.

Gihatagan sa Dios, ang nasud Israel ug lain nga oportunidad aron sa pagdawat sa ilang nabanhaw nga Hari aron ang gisaad nga GINGHARIAN matukod diin ang gitawag nga DALAN SA GINGHARIAN MATAPUS: kay kini lamang ang bugtong paagi aron ang gisaad sa Dios nga panalangin madawat sa tibuok nga kalibutan. Ngano man kaha nga ang Dios nagpakita sa Iyang pagkamaloloy-on ug gihatagan ang nasud Israel ug lain pa nga higayon sa pagpanguluos nga human na man nila gisalikway ug gilansang si Cristo sa niini tungod kay:

Si Cristo nag-ampo didto ibabaw sa krus, "Amahan pasayloa sila . . ." Lucas 28:34.

2. Ang Dios nagsaad kang Adam ug Eva, Abraham, Isaac, Jacob, David, ug sa uban pa nga ilang kaliwatan nga pinaagi sa ilang kaliwat, nga mao si Cristo (Galacia 3:16), ug sa nasud Israel, ang buok kalibutan mapanalanginan.

3. Buot sa Dios nga mahatagan ang mga Israelinhon sa katapusan nga higayon aron mapamatud-an unsa ang diha sa ilang mga kasingkasing. Sila misalikway ug mitalikod sa Dios sa miaging mga panahon pinaagi sa pagpili ug hari ug pagsimba sa mga diyos-diyos;

ug pinaagi sa paglansang usab ni Cristo, ang ilang Hari, sa krus. Ug karon buot gayud sa Dios nga masayran kon unsa ang ilang pagtagad sa Espiritu Santo nga Iyang ipadala.

Niadtong adlaw sa Pentecostes, kalim-an ka adlaw gikan sa Iyang paglansang sa krus, dihay usa ka gatus ug kaluhaan (120) ka mga magtotoo nga nagtigum aron sa pag-ampo ug si Cristo ang nabanhaw sa mga minatay nagtugon kanila sa pagingon, "Pabilin una kamo sa siyudad . . ." Lucas 24-49. Ug sa kalit may miabut nga dahunog gikan sa langit . . . Basaha ang Mga Buhat 2:1-14.

Si Pedro human niini mitindog ug namulong sa pagingon. "Kay kini mao ang giingon ni profeta Joel," Mga Buhat 2:38-41; Joel 2:28-29. Nahinumdoman pa ba nimo nga si Cristo, nagingon nga si Pedro mao ang gihatagan sa yawi (autoridad) sa GINGHARIAN? Ug niadtong adlaw may tulo ka libo nga mitoo sa gipamulong ni Pedro nga ang Dios naghatag kanila ug lain pa nga higayon sa paghinulsol ug magpabautismo aron mapasaylo ang ilang sala paglansang ni Cristo sa krus, Mga Buhat 2:38.

Ang mga apostoles ug kadtong tanan nga nanagpanoo nanagpakadawat sa gisaad nga gahum. Ug sila nagsugod sa paghimo ug mga daghang mga milagro pinaagi sa ngalan ni Jesus nga nabanhaw gikan sa mga patay. Basaha ang Mga Buhat 3:1-11.

Sa pagkatinuod kini mao na ang panahon nga mobalik na unta ang Hari, Mga Buhat 3:19-21. Apan hulat una, ang mga pangulo, Radtong maoy nagsugo sa pagpalansang ni Cristo, nanagpakabati sa mga pagpamatuod sa Espiritu Santo pinaagi sa mga apostoles. Apan wala pa gihapon maandam nila ang DALAN SA GINGHARIAN alang sa ila nga Hari. Human sa una nga mga paghimo ni Pedro human sa Pentecostes, ang mga pangulo nanagsugod sa pagpanglutos kanila. Ang mga sacerdote, mga tinugyanan sa templo, mga Saduceo . . . nanagbanlud kanila sa bilangoan, Mga Buhat 7 ug si Saulo miuyon nga pagapatyon si Esteban.

Unsa man ang pagabuhaton sa Ginoo nga gisalikway na man usab nila ang nabanhaw nila nga Hari ug nanagpakasala batok sa Espiritu Santo? Kining tanan nga ilang ginabuhaton nahibaloan na nga daan ni Jesus kay Siya nagpamatuod nga igasalikway Siya sa nasud Israel, Mateo 21:42-46; ug namulong sa pag-ingon nga ang sala batok sa Anak pagapasaylo-on, apan ang pagpasipala sa Espiritu dili gayud pasaylo-on, Mateo 12:31. Ug atong mapamalandong

pagusab ang pagkadili matinoohon mao ang kanunay nagababag sa DALAN SA GINGHARIAN nga mao usab ang nakababag sa ilang pagpanaw paingon sa yuta sa Canaan sa didto pa sila sa kamingawan sa Kadeshbarnea.

Ang pagkadili matinoohon nagadala ug kasub-anan ug kagubot. Ang mga apostoles nga nanagpakakita nanagpanoo nga si Cristo tinuod gayud nga nabanhaw sa lubnganan. Ug silang tanan nangahimong mga matuod nga saksi sa atong Ginoong Jesu-Cristo.

Karon, ikaw ug ako, nga nagkinabuhi ilalum sa LANDIGANAN SA GRASYA wala managpakakita kang Cristo nga nabanhaw apan aduna kitay matuod nga kasaysayan nga nasulat sa Bibliya. Ang Dios nagatinguha nga kita managpanoo sa Iyang Pulong aron mahimo kita nga mga tinugyanan sa atong Ginoong Jesu-Cristo aron maoy magpamatuod Kaniya.

Ang Dios nagatinguha nga isugid nato ngadto sa mga katawohan nga si Cristo lamang mao ang atong bugtong nga manluluwas ug magatudlo sa mga katawohan nga diha lamang sa pagtoo ug magdawat Kaniya nga maoy nagpakamatay sa atong mga sala makaaton kita ug kaluwasan ug pasaylo sa atong mga sala aron maka-sakay nianang gitawag nga SAKYANAN SA MGA LUWAS sa atong dibuho. Kay si apostol Pedro nagpamatuod nga, "Walay kaluwasan pinaagi kang bisan kinsa pa nga lain . . ." Mga Buhat 4:12.

AG-ULOHON: "Ug walay kaluwasan pinaagi kang bisan kinsa nga lain; kay walay bisan unsa pang lain nga ngalan sa silong sa mga gikahatag ngadto sa mga tawo, nga pinaagi niini malu-"  
Mga Buhat 4:12.

### *Pagtulon-an 20 — Pagatubagon*

Susiha kining mga bersikulo sa ubos ug imong makaplagan ang tubag sa maong mga pangutana.

1. Unsa man ang gipangutana sa mga apostoles kang Cristo mahitungod sa GINGHARIAN sa dihang mipakita Siya human sa Iyang pagkabanhaw? Mga Buhat 1:6 . . . . .

2. Unsa man ang gitubag ni Cristo? Mga Buhat 1:7 . . . . .

3. Unsa man ang gisulti ni Cristo ngadto sa mga apostoles nga ilang madawat inig-abut sa Espiritu Santo? Mga Buhat 1:8. . . . .
4. Unsa man dayon ang ilang katungdanan human nila madawat kini? Mga Buhat 1:8. . . . .
5. Unsa man ang gisulti ni Apostol Pedro ngadto sa mga Israelinhon nga ilang pagabuhaton niadtong adlaw sa Pentecostes? Mga Buhat 2:38. . . . .
6. Unsa man kaha ang katuyoan sa Dios nga gihatagan pa man ang mga Israelinhon ug lain pa nga higayon sa paghinulsol ug pagdawat sa ilang gisalikway nga Hari nga human na man nila gilansang si Cristo sa krus? Lucas 23:34. . . . .
7. Unsa man ang gisaad sa Dios ngadto kang Pedro nga maoy nakapahimo kaniya nga pangulo diha sa DALAN SA GINGHARIAN Mateo 16:19. . . . .
8. Unsa man ang gisaad sa Dios nga maoy nagaaghat kanato sa pagbuhat alang sa Ginoo sama kang Pedro ug mga kauban? 1 Corinto 3:8. . . . .
9. Unsa man nga balita ang atong iwali ngadto sa mga tawo niining PANAHAON SA GRASYA, aron ang mga tawo mangaluwas ug masakay nianang SAKYANAN SA MGA LUWAS? Roma 10:9. . . . .
10. Isulat nga SINAG-ULO ang Mga Buhat\*4:12. . . . .